

## KONSEP MAQASID SUNNAH MENURUT DR. AHMAD AL-RAYSUNI DALAM KITAB *MAQASID AL-MAQASID*

ABDUL HADI AWANG

*abdulhadi@kuis.edu.my*

Kolej Universiti Islam Antarabangsa Selangor (KUIS)

### ABSTRAK

*Permasalahan maqasid telah dibincangkan oleh para ulama terdahulu seperti al-Ghazali, Ibn 'Asyur dan selainnya. Namun perbincangan tersebut lebih kepada maqasid al-Quran dan maqasid shari'ah manakala perbincangan berkaitan maqasid sunnah adalah sangat sedikit. Oleh itu, artikel ini bertujuan untuk membincangkan dan mengeluarkan konsep maqasid sunnah menurut ulama maqasid kontemporari Dr. Ahmad al-Raysuni melalui bukunya *Maqasid al-Maqasid*. Kajian ini menggunakan metodologi kualitatif melalui analisis teks buku. Dapatan kajian ini sangat penting kepada para pengkaji dan pembaca hadis untuk lebih memahami tujuan sebenar sesuatu hadis itu disampaikan oleh baginda Rasulullah SAW.*

**Kata kunci:** *Maqasid sunnah, Ahmad al-Raysuni, Maqasid al-Maqasid.*

### 1.0 PENGENALAN

Konsep maqasid sunnah adalah satu istilah yang baru digunakan akhir-akhir ini oleh ulama-ulama kontemporari walaupun perbincangan maqasid secara umum telah banyak dibicarakan oleh para ulama sebelum ini. Kebanyakan ulama memfokuskan kepada penulisan maqasid shari'ah (Rizalman, 2016) berbanding maqasid-maqasid yang lain. Imam Ghazali (1111 M) merupakan pembuka ruang kepada penulisan maqasid shari'ah melalui penulisan beliau berkaitan maqasid al-quran dalam kitab *Jawahir al-Qur'an* (Yusuf, 1994). Setelah itu Ibn 'Asyur (1973 M) telah mengarang sebuah kitab yang sangat berharga sehingga menjadi rujukan utama dalam maqasid shari'ah iaitu *Maqasid al-Shari'ah al-Islamiyyah*.

Perbincangan maqasid sunnah secara istilahnya seperti tidak pernah ditulis dalam penulisan sebelum ini melainkan Dr. Ahmad al-Raysuni. Jika ada yang membincangkannya sebelum ini, masih berlindung di bawah maqasid shari'ah seperti perbincangan maqasid ibadah daripada perspektif sunnah dan sebagainya.

## 2.0 OBJEKTIF KAJIAN

Kajian ini bertujuan untuk membincangkan dan mengeluarkan konsep maqasid sunnah menurut ulama maqasid kontemporari Dr. Ahmad al-Raysuni melalui bukunya *Maqasid al-Maqasid al-Ghayat al-Ilmiyyah wa al-Amaliyyah li Maqasid al-Shari'ah*. Konsep maqasid sunnah ini penting untuk diaplikasikan kepada hadis-hadis Nabi SAW bagi memahami sesuatu hadis dengan tepat.

## 3.0 METODOLOGI KAJIAN

Kajian ini menggunakan metodologi kualitatif melalui analisis teks buku. Data yang telah diambil daripada buku akan dianalisis melalui kaedah kajian teks.

## 4.0 ANALISIS KAJIAN DAN PERBINCANGAN

Maqasid sangat penting untuk dikaji kerana maqasid adalah ruh kepada amalan. Bahkan teori ini terpakai untuk semua perkara yang dilakukan oleh umat Islam. Setiap perkara perlu kepada ruhnya seperti ruh al-Quran adalah maqasidnya. Begitu juga ruh al-Sunnah itu adalah maqasidnya (al- Raysuni, 2013).

Maqasid Shari'ah pada hakikatnya sangat berpegang kuat dengan nas al-Quran dan al-Sunnah. Maqasid yang terbentuk merupakan hasil kajian dan penelitian yang mendalam terhadap nas-nas secara zahir dan batin, lafaz dan maksud dan *kuliyah* dan *juz'iyah* (al- Raysuni, 2013). Maqasid dan nas-nas al-Quran dan al-Sunnah sangat berkait rapat tanpa ada pemisahan dalam memahami kedua-duanya.

Maqasid Sunnah pada umumnya adalah sama dengan maqasid al-Quran kerana maqasid Sunnah tidak lebih daripada mengulang, menguatkan dan menjelaskan apa yang dimaksudkan oleh maqasid al-Quran secara umum. Namun, secara khusus terdapat perbezaan antara maqasid al-Quran dan maqasid Sunnah iaitu berkaitan tentang maqasid Sunnah secara khusus dan praktikal.

Terdapat dua perkara penting dalam maqasid Sunnah untuk membina kefahaman yang benar dan menunjukkan jalan agama yang sah menurut al-Raysuni:

1. Berusaha meletakkan Sunnah dan hadis Nabi SAW di tempatnya yang sepatutnya bertepatan dengan maqasid syara'.
2. Mengelakkan daripada terjatuh dalam tafsiran dan amalan yang menyimpang daripada tujuan sebenar syara' sehingga menyebabkan berlaku penyelewengan agama.

Bagi memahami maqasid Sunnah dengan tepat, al- Raysuni telah meletakkan dua kaedah utama untuk difahami dengan baik iaitu mengetahui

kedudukan dan sifat Nabi SAW ketika menyampaikan kata-kata dan mengetahui sebab wurud hadis dan memahami konteksnya.

### **Mengetahui Kedudukan Dan Sifat Nabi Ketika Menyampaikan Kata-Kata**

Seperti yang telah sedia maklum, baginda Nabi SAW ketika menyampaikan kata-kata ataupun sesuatu hadis bukanlah hanya pada satu keadaan sahaja bahkan baginda SAW menyampaikan kata-kata dalam berbagai kedudukan dan keadaan dengan tujuan yang pelbagai juga antaranya seperti berikut:

1. Baginda SAW bercakap dan berurusan dengan kedudukan sebagai seorang Rasul dan Nabi dalam menyampai, menjelas dan melaksanakan wahyu.
2. Baginda SAW bercakap sebagai seorang manusia biasa yang juga lapar, dahaga, makan, minum dan sebagainya.
3. Baginda SAW bercakap sebagai seorang ahli masyarakat yang mempunyai adat kehidupan.
4. Baginda SAW bercakap sebagai seorang pemimpin negara yang menjadi ikutan ramai.
5. Baginda SAW bercakap sebagai seorang pemimpin di medan perang dalam mengatur strategi peperangan.
6. Baginda SAW berperanan sebagai seorang hakim yang mendamaikan antara dua orang yang bergaduh.
7. Baginda SAW berperanan sebagai penasihat dalam keadaan tertentu menasihati para sahabatnya.
8. Baginda SAW diminta bercakap mewakili sebahagian kaum dan bercakap dengan tujuan yang diminta.
9. Baginda SAW kadang-kadang menyuarakan pendapatnya dalam hal-hal keduniaan berdasarkan pengalaman dan penilaian peribadi.

Contohnya ketika peperangan Hunayn baginda SAW bersabda “*Sesiapa yang membunuh (musuh), baginya harta simati (salab)*”. Secara zahirnya, hadis ini memberi erti sesiapa yang dapat membunuh musuh di medan perang, akan mendapat harta si mati daripada pedang, harta dan sebagainya. Tetapi ulama berbeza pendapat adakah arahan ini umum dan berterusan dalam semua peperangan tanpa pembahagian daripada panglima perang? atau adakah hadis ini hanyalah pendapat sebagai seorang panglima perang untuk peperangan tertentu sahaja?

Imam Ahmad dan Imam al-Shafie berpendapat harta *salab* disyariatkan tanpa perlu persetujuan panglima perang. Imam Abu Hanifah berpendapat mesti mendapat persetujuan panglima perang manakala Imam Malik mensyaratkan persetujuan panglima perang selepas peperangan.

Menurut al-Raysuni, hadis di atas bukanlah satu arahan yang bersifat kenabian dan pensyariaan secara umum. Beliau mentarjihkan pendapat yang

harta *salab* mesti mendapat persetujuan panglima perang berdasarkan beberapa perkara:

1. Hadis tersebut adalah berlawanan dengan maksud asal peperangan dalam Islam iaitu untuk meninggikan syariat Islam bukanlah untuk mendapatkan harta rampasan perang.
2. Hadis ini juga berlawanan dengan ayat al-Quran yang menyatakan harta rampasan perang dikumpul dan dibahagikan oleh panglima perang.

Oleh itu, hadis ini adalah arahan baginda SAW sebagai seorang panglima perang yang bersifat sementara dan khusus dalam keadaan tertentu untuk peperangan Hunayn sahaja. Oleh sebab itu, hadis ini juga tidak boleh diambil kefahaman secara umum untuk semua peperangan dan untuk sepanjang zaman.

### **Mengetahui Sebab *Wurud* Hadis Dan Memahami Konteksnya**

Sebab *wurud* hadis seperti sebab turun al-Quran iaitu peristiwa, persoalan atau keadaan yang menyebabkan baginda SAW menyampaikan hadis tersebut. Pengetahuan mengenai sebab *wurud* sangat penting dan banyak memberi manfaat dalam memahami maksud sesuatu hadis kerana ketidakfahaman tentang sebab *wurud* akan menyebabkan seseorang terkeluar daripada memahami maksud hadis yang sebenar.

Contohnya dalam sabda baginda SAW yang bermaksud “*Jika salah seorang daripada kamu mendatangi Jumaat (solat Jumaat) maka hendaklah dia mandi*”. Secara umumnya hadis ini memberi maksud sesiapa yang hendak ke masjid menunaikan solat Jumaat hendaklah mandi terlebih dahulu.

Ulama berbeza pendapat dalam perkara ini adakah ianya wajib atau sunat? Adakah dikira mandi malam jumaat atau pada awal paginya ataupun mesti betul-betul sebelum solat Jumaat? Terdapat dua atau beberapa pendapat fuqaha’ dalam masalah ini.

Hakikatnya, hadis ini sangat jelas tanpa perlu kepada beberapa pendapat lain jika difahami hadis ini menerusi sebab *wurudnya*. Dalam *sahihayn* ‘Aisyah berkata, “*Pada hari jumaat semua orang akan datang ke masjid daripada rumah mereka dalam keadaan berdebu dan berpeluh maka berkata baginda SAW kepada salah seorang daripada mereka, “Adalah lebih baik jika kamu membersihkan diri kamu pada hari ini”*”.

Menurut al- Raysuni, hadis ini memberi maksud mandi sebelum jumaat adalah wajib bagi sesiapa yang badannya terdapat debu dan peluh yang boleh menyakiti para Jemaah manakala ianya sunat bagi sesiapa yang tidak ada padanya debu atau peluh.

## **5.0 KESIMPULAN**

Mengetahui maqasid Sunnah sangat penting dalam memahami maksud sebenar sesuatu hadis untuk diamalkan. Kesan tidak memahami maqasid Sunnah akan menyebabkan hilangnya hikmah dan tiada faedahnya sesuatu hadis itu. Di samping itu, ketidakfahaman tentang maqasid Sunnah akan menyebabkan seseorang menggunakan hadis secara salah dengan meletakkannya bukan pada tempatnya yang menyebabkan kepada kemudaratan dan kebinasaan.

## **RUJUKAN**

- Dr. Ahmad al-Raysuni. 2013. *Maqasid al-Maqasid al-Ghayat al-‘Ilmiyyah wa al-‘Amaliyyah li Maqasid al-Shari‘ah*. Beirut: al-Shabkah al-‘Arabiyyah li al-Abhas wa al-Nashr.
- Rizalman Muhammad. 2016. *Maqasid Ibadah Haji Dalam Perspektif Sunnah: Kajian Terhadap Kefahaman Dan Amalan Jemaah Haji Malaysia*. Tesis Phd Akademi Pengajian Islam, Universiti Malaya.
- Yusuf Hamid al-`Alim. 1994. *Al-Maqasid al-`Ammah Li al-Shari`ah al-Islamiyyah*, ed. ke- 2. al-Ma`had al-`Alami Li al-Fikr al-Islami.